

Finà via n ann de gran sodesfazion y suzesc

Senteda generala dla grupa de bal populer Sëlva/S. Cristina. Chëst ann iesen jic tla cëses a cianté la tlecanoht do la usanza da plu da giut

Lies - N venerdì ai 9 de dezember à la grupa de bal populer de Sëlva y S. Cristina tenì tla sala de Chemun de S. Cristina si senteda generala. L presidënt Andreas Delago à rengrazià duta l'autoriteies unides adalerch n chëla sèira, scumencian dal assessëur per la cultura de S. Cristina, Alexander Bauer, l cumëmber de unëur Bruno Riffeser sciche nce belau duc i cumëmbri che ie unic adalerch per l'ucajion.

Cialan de reviers iel da laudé l gran mpëni dla grupa ntan l 2005, ulache l ie da auzé ora la bela aparizion a Bagno Vignoni tla Toscana y la desëina de iedesc che l ie unì repurtà dla grupa tla stampa per la fé cunëscer al publich, davia che la grupa ie nasciuda te chësta custelazion dan mé 4 ani y à sën bele n bon inuem a nivel de raion. De ndut se à i balarins ancuntà via per l ann passa 70 iedesc cumpedan pea proves, aparizions y sentedes. Per tosc se ncunforta 8 cumëmbri dla grupa a pudèi jì de fauré ala gaurida di juecs olimpics de Torino 2006 che ie da udèi tla televijion sëura dut l mond. L program per l 2006 ie bele drët rich y nce tl proscimo ann ne manceràl nia l viac al scumenciamënt de setëmber per purté la cultura y nosta bela trohtes nce oradecà.

Na pitla scincunda àn njenià per Laura Cuccarolo (nia prejenta) che à sunà ntan l ann cun gran ntujiasm canche la grupa ova da purté dant si bai y a Martin Zingerle, maester de bal y cassier, che à laurà scialdi per la grupa. Coche bele ti ultimi ani à l presidënt Andreas Delago sambën nce premià l mut y la muta che fova plu lezitënc a unì a proa. Duc i cumëmbri adum ti à fat ala fin al presidënt na blòta sorpreja y scincunda.

A Rita Delago, che se à maridà d'instà via, ti iel unì sëurandat sciche le cort doi popes de stram cun la troht dla lia. Ti mbincian per l dauni legrëza, fertuna y sanità. Duc i cumëmbri dla lia, al mumënt 27, se ncunforta sun l ann che vën. Ulessan ala fin mo rengraziè duta la jënt de Sëlva y S. Cristina che nes à tëtut su bën te si cëses n ucajian dla Tlecanoht, che on chëst ann purvà de cianté coche l univa fat dan 50 ani cun duta si figures. A trueps ti à chësc sapù drët bel y cialeron inant de tenì su chësta usanza che jiva for plu y plu perduda.

A duc i letëures y a duc chëi che nes à judà ti mbincions mo de bela festes da Nadel y dut l bon per l Ann Nuef.

N vanguni dl cunsëi dla lia bal populer Sëlva/S. Cristina



I balarins de Sëlva y S. Cristina se à mascarà su per cianté la tlecanoht, coche l fova tradizion plu da giut.